

Soraarnerussutisiaqalernissamut aaqqissuussinermut peqataasussaataaneq pillugu apeqquteqaat aallaavigalugu oqallinnissamik siunnersuut

(Inatsisartunut ilaasortat Hans Enoksen, Pele Broberg, Jens Napátoq, Partii Naleraq)

Akissuteqaat

(Aningaasaqarnermut Aatsitassanullu Naalakkersuisoq)

Soraarnerussutisiaqalernissamut aaqqissuussinermut peqataasussaataaneq pillugu apeqquteqaat aallaavigalugu oqallinneq manna Naalakkersuisut sinnerlugit qujassutigerusuppara.

Soraarnerussutisiaqalernissamut aaqqissuussinermut peqataasussaataanerup atuutsinneqalernissaanik eqqarsaat Akileraartarneq Atugarissaarnerlu pillugit Isumalioqatigiissitamit aallarnerneqarpoq. Inatsisissatut siunnersuummut 2016-imi saqqummiunneqartumut nassuiaatini allassimasutut siunissami ungasinnerusumi pisortat aningaasaqarnerannik attanneqarsinnaasumik qulakkeernissaq aammalu siunissami soraarnerussutisiaqalertussat inuuniarnerannik pitsanngorsaanaissaq inatsimmi anguniarneqarpoq. Inatsisissatut siunnersuut 26-nit isumaqataalluni taasisoqarluni ataatsimillu akerliulluni taasisoqarluni akuersissutigineqarpoq.

Ilimagaara 2016-imi inatsisissatut siunnersuummik oqallinnermi peqataasut ilisimaarilluinnarsimassagaat innuttaasut amerlasuut soraarnerussutisiaqalernissamut ileqqaagaqanngitsut. Inatsimmut nassuiaatit malillugit taamani naliliisoqarpoq innuttaasut 9.000-it missaat suliffeqaraluarlutik soraarnerussutisiaqalernissamut aaqqissuussinermut akiliuteqarneq ajortut. Taamaattumillu innuttaasut amerlanerusut soraarninngornissaminnut ileqqaagaqalernissaannik imaluunniit amerlanerusunik ileqqaagaqalernissaannik inatsisip nassataqarnissaa Inatsisartuni partiinit tupaallaatigineqartariaqanngikkaluarpoq.

Ilimagaarali innuttaasut arlallit inatsisip aningaasaqarnikkut inissisimanerminnut sunniutissai ukiaq kingulliup ingerlanerani paasigamikkut tupaallassimassasut. Akileraartarnermut Aqutsisoqarfik, aningaaseriviit SISA-lu tamarmik immikkut periaaseqarlutik malittarisassat nutaat pillugit aammalu innuttaasut soraarnerussutisiassanut aaqqissuussamik pilersitsinissaannik tassungaluk akiliuteqartarnissamik siammasissumik paasititsiniaaniarsimapput. Ullumikkulli isumaqarluinnarpunga naammattumik eqqortumillu paasititsiniaasoqarsimangitsaq. Pitsaanerusumik iliuuseqarsimasinnaagaluarpuq tamannalu ilinniutigisariaqarparput.

Maanna kukkunerit oqaluuseritillugit eqqumaffigaara ilaatigut kukkusumik nalunaaruteqarnerit kingunerisaannik innuttaasut 935-t missaat skattekortimik akileraarutaasussanut qaffasippallaartumik procentilikkamik nassinneqarsimasut aatsaat 2020-p aallartinnerani paasineqarmat. Kukkunerilli pilertortumik iluarsineqarput pineqartullu

skattekortimik eqqortumik nassinneqarlutik. Taamatut kukkusoqarsimanera assut utoqqatsissutigaa. Isumaqarpungali nutaanik aallartitsisoqartillugu pisinnaasut tamanna ilagigaat.

Inatsisartut inatsisaata allannortinneqartariaqarneranik kissaatinik sammivinnik assigiinngitsunit saqqummiussisoqarpoq. Sulisitsisut soraarnerussutisiassanik unerartitsinissamut akiliuteqarnissamullu pisussaaffeqalersillugit aaqqissuussineq allannortinneqassasoq ilaasa siunnersuutigaat. Oqaatigisinnaavara periarfissat assigiinngitsut Naalakkersuisuni maanna isumaliutigigatsigit aammalu inatsisissatut siunnersuut ukiakkut ataatsimiinnermi saqqummiunneqarsinnaasutut naatsorsuutigisarput sulissutigaarput, tamatumani anguniarneqarluni aaqqissuussinerup pisariitsumik aqunneqarsinnaanissaa aammalu innuttaasut sapinngisamik annikinnerpaamik akiitsoqarnissaat.

Soraarnerussutisiaqalernissamut aaqqissuussinermut peqataasussaataaneq pillugu Inatsisartut inatsisaata piaarnerpaamik atorunnaarsinneqarnissaa Partii Naleqqamit suliniutigilerneqarpoq, tamatumalu peqatigisaanik innuttaasut ileqqaaruteqarnissaat toqqaannartunik akerleralugu.

Isuma tamanna Naalakkersuisunit soorunami isumaqatigineqanngilaq. Naalakkersuisut suli isumaqarput innuttaasut soraarninngorunik pitsaasumik inuuneqarnissamik qulakkeerneqarnissaat pingaaruteqartorujussuusoq. Akerlianik Coronamik ajornartorsiuteqarneq eqqarsaatigalugu inatsimmi ileqqaaruteqarnissamik pisussaaffimmut tunngasut sivisunerusumik atuutsikkiartuaarnissaat pisariaqassanersoq pillugu oqalleqataanissartik Naalakkersuisut kissaatigaat. Assersuutigalugu 2020-mi ileqqaaruteqarnissami akiliutissat 6 procentimik minnerpaaffilerneqarnerat 2021-mi 2022-milu aamma atuuttussanngorlugu sivitsorneqarsinnaavoq. Taama sivisunerusumik atuutsitsiartuaarnikkut innuttaasut ataasiakkaat aningaasaqarnikkut atukkaminik naleqqusaanissaminut piffissaqarluarnerulissapput. Tamannali siunissaq ungasinnerusooq isigalugu aaqqiissutissatut pitsaanngilaq, tassa innuttaasut soraarnerussutisiassanik ileqqaarutaat pitsaannginnerulissammata, taamaalillunilu siunissami soraarnerussutisiallit piitsut amerlanerulissammata. Tamatuma peqatigisaanik taama kinguartitsineq nunatsinni aningaasaqarnerup attanniarnerni ajornartorsiutit annertuseriarnernik nassataqassaaq.

Paasisinnaanngilara sooq Partii Naleraq oqarsinnaammat maanna aaqqissuussineq atorlugu innuttaasut aningaasat atorsinnaasaat 64 procentimik ilanngarniarneqartut. Tamanna kukkunerullunilu akueriuminaatsumik uukapaatitsiniarneruvoq. Tunngaviusumik isigalugu inatsimmi allassimavoq ileqqaarutinut akiliutit piffissami 2019-2024-mi ukiumoortumik 1 procentimik qaffaavigineqartassasut, taamaalilluni 2024-mi akiliutissat 10 procentiussallutik. Taamaattumik kinaluunniit imminut oqarfigisinnaavoq akiliutissat ataatsimut 64 procentimik annertussuseqalertinnissaat anguneqarsinnaanngilluinnartoq. Tamatuma saniatigut innuttaasup soraarnerussutisiassanut aaqqissuussamut akiliutai innuttaasumit pigineqarput – pisortanit pigineqaratik. Partii Naleraqqap eqqarsartaasia malillugu tamanna isumaqarpoq innuttaasup kamippannik nutaanik pisinermini 500 kr.-t atugarisartagai innuttaasup aningaasaataanit atorsinnaasaanit ilanngaatigineqassasut. Taama naatsorsueriaaseq

isumaqanngilaq. Aammattaaq innuttaasumut akileraarutigut ilanngaatit eqqumaffigineqanngimmata naatsorsukkat kukkuneqareerput.

Aammattaaq paasissutissiissutigisinnaavara Akileraartarnermut Aqutsisoqarfik piffissami kingullermi qarasaasiakkut misissuineramik ingerlataqarmat, tamatuma nassatarisaanik innuttaasut arlallit skattekortimik nutaamik procentimik qaffaanngitsunik akileraarutitalimmik nassinneqarlutik.

Naggasiullugu Naalackersuisut sinnerlugit oqaatigerusuppara Inatsisartut inatsisaata allannguutigisinnaasai pillugit Inatsisartuni partiit soqutigisaqatigiillu allat oqaloqatiginissaannut piumassuseqaratta. Siumoortumilli qinnuiginnikkusuppunga tusatsiakkat tunngaviginagit pissusiviusulli tunngavigalugit oqallissasugut.

Naalackersuisut taama oqaaseqarlutik ilaasortat isumaasa tusarnissaat qilanaaraat.